

四庫全書

集部

欽定四庫全書

文敏集卷二十一

明 楊榮 撰

墓誌銘

故榮祿大夫少保兼太子少傅戶部尚書贈特

進光祿大夫太師諡忠靖夏公墓誌銘

國家當太平興盛之運必有股肱心膂之臣以謀猷輔
相於其間而後克成治功故榮祿大夫少保兼太子少
傅戶部尚書夏公實其人焉公諱原吉字維詰其先自

浙之會稽徙三衢五代時有諱膺者惡吳越虐政復自
開化徙饒之德興祖希政仕元為湖廣行省都事值兵
亂死節家屬流寓沔岳間父時敏國朝以明經起為湘
陰教諭遂為湘陰人曾祖復及祖父皆以公推恩贈榮
祿大夫少保兼太子少傅戶部尚書曾祖妣李氏贈夫
人祖妣劉氏妣廖氏皆加贈一品夫人公年十三而孤
母太夫人守節自誓辛勤訓誨俾務於學公祇服慈訓
夙夜克勤弱冠充縣學生洪武庚午領湖廣鄉薦明年

試禮部弗偶入太學壬申授戶部四川司主事有能聲
歲戊寅陞戶部右侍郎太宗皇帝入正大統以公謹厚
可任轉左侍郎尋陞尚書永樂癸未夏四月蘇松水患
公承命往治既至詢衆議浚決壅滯水患以寧復請發
粟三十餘萬石以賑饑民全活甚衆乙酉召還益見寵
任己丑車駕巡狩北京公與扈從明年春三月太宗親
征朔漠今上以皇太孫留守北京承命輔導秋八月駕
還以公克盡匡輔之職賜鞍馬楮幣羊酒以旌異之明

年九載秩滿降勅獎諭錫宴於便殿既而承詔監修太祖高皇帝實錄既成賜綵幣衣鈔宴於禮部庚子以北京宮殿成奉勅召皇太子於南京既至賜以白金羊酒鞍馬辛丑太宗以朔方遺孽未殄復議征之公以邊儲未脩被繫甲辰秋七月太宗賓天仁宗皇帝即位首釋公復其官賜冠帶衣服帷帳之屬公以母喪未終辭仁宗勉留之賜米四十斛鈔一萬貫胡椒二斛令家屬護喪以歸命有司治喪葬八月拜太子少傳戶部尚書尋

拜榮祿大夫少保兼太子少傅戶部尚書給以銀章其
文曰繩愆糾繆凡朝政闕失民間利病切於時務欲有
所言者輒用之密封以聞公由是屢有所陳多所裨益
乙巳奉勅監修太宗實錄是歲夏五月仁宗晏駕今上
皇帝即位復承詔監修仁宗實錄宣德戊申上以師保
之重專職寅亮不煩以政事命輟戶部之務日在左右
討論至理以寧邦家公益竭乃心忠勤彌篤庚戌春正
月壬戌進兩朝實錄賜白金綵幣襲衣鞍馬戊寅錫宴

於中府明旦入謝既退得微疾命家人具湯沐正襟端坐召其弟及子告之曰吾以一介書生叨居重任愧無以報國家言訖而終訃聞上為之嗟悼命有司製棺給賻物追贈持進光祿大夫太師諡忠靖遣禮部尚書胡濙祭之官其子瑄為尚寶司丞永蠲其家差役仍給舟車歸其喪為造墳塋公生元至正丙午八月廿六日享年六十有五配鄭氏賢而克相子男三人長琬早卒次即瑄次瑾女一人善金適虞瑞故宗人府經歷暹之子

也弟原乾奉公柩歸以某年某月某日葬某山之原乃以戶部員外郎惠政所為行狀請予銘予辱知於公最久且厚知公為悉其何敢辭惟公忠信和易喜怒弗形坦夷直諒無忤於物可謂寬仁厚德之君子矣歷事累朝荐膺寵眷信任益專叅決機務疑難之際往往一言而定卓然為國家輔弼之大臣是宜有銘銘曰

天啓皇明實生賢輔蚤孤而立發迹郎署貳卿之任邦計所司國有儲恃民無阻饑於赫太宗入正大統進公

司徒益被恩寵東南諸郡洪水湯湯彼民其咨若昔懷
襄命公往治公如已溺寢食弗遑水患以息自公還朝
信任益專扈從兩京厥聲隆然仁宗嗣位眷顧尤隆簡
賢任舊爵位是崇進秩三孤公有重望在帝左右惟公
寅亮今皇繼統舊德是資政務弗煩治道所咨翼然在
廷公尚弗耄遽茲遐逝帝用嗟悼豐爵美諡恩禮薦加
既官厥嗣復恤其家恩榮終始惟公克稱允矣大臣永
光休命湘江之陰有歸者墳後有求公視茲刻文

故儒林郎左春坊左贊善兼翰林編修陳先生

墓誌銘

始予游郡庠聞長樂陳先生仲完以文學行誼著於鄉心甚慕之而以未識為恨暨予由科第入翰林之四載為永樂初元遂得胥會於京師覩其儀表聆其論議迹其操存踐履之誠於是益敬而愛之而信昔之所聞者為弗虛也既而先生用知者薦擢翰林編修明年陞左春坊左贊善仍兼編修皆同寮由是日得相親以篤斯

文之契鄉郡之好藹然甚歡也不數年予以扈從北上而先生留南京雖睽違既久嚮慕彌切每復一見而情意益密焉惟先生之在詞林日侍內廷小心慎密編摩纂輯克專克勤其在春坊論思精切贊輔得宜夙夜在公恪盡乃職以是深蒙恩眷錫賚益隆時東宮殿下以皇孫日長乃察先生忠厚特命侍講學先生貌恭氣和詞意懇款啓迪有方多所裨益十五年春三月隨侍來北京十八年夏五月復還南京是秋大比承命主京闈

文衡去取惟公士論悅服比冬復至北京蓋先生崇道敦德樂善好義之志愈老而愈篤人無戚疎賢愚貴賤皆稱其為有德君子二十年十二月初九日以疾卒於北京之寓舍方疾亟時以其子冷在鄉遺命訓飭之甚至而殯殮之事一皆以命其從子中書舍人登與冷而復得甥壻文選主事陳良鄉友翰林修撰李騏贊襄之一時斯文莫不臨哭弔祭歔歔太息以為無復有斯人矣非先生之德之誠曷克致是哉明年春冷始聞訃甫

畋而來將奉喪歸葬其鄉大溪山之原以登所述行實
來謁子銘義不可辭按狀先生諱完仲完其字也以其
恬憺簡約自號曰簡齋其先光州固始人五代時因避
梁難入閩居玉融南陽之新豐至諱泰者析居長樂之
江田再世有諱龜圖者登宋進士第歷國子監丞朝散
大夫信州府知府又傳十一世諱叔友者為宋興化軍
主學先生之高祖也曾祖諱世榮任福清知縣有善政
祖諱宗舉考諱天雄皆隱居弗仕而樂善好施輕財重

義人多德之母張氏有賢行先生自幼務學孝友謙恭
年十五以民秀選充邑庠生從吳彥信葉希武二先生
受學洪武甲子與從子湜洵皆薦於鄉鄉人有一門三
舉子之謠是年丁外艱弗及會試服闋用薦分教延平
郡學復改直隸寧國其為人雍容和緩簡默凝重而表
裏一致其為學以窮理為務實踐為要而不屑屑章句
其教人循循有序不厭不倦而多所造就其接人禮意
兼盡而無忤於物凡有求詩文者皆弗拒輒舉筆成之

雖若不經意而詞理俱造人鮮能及有迂藁若干卷藏於家嘗以事還鄉率宗人建祠堂以奉先而尤諄諄訓戒子姓以務學力善無忝祖宗姻戚鄉族莫不倚賴焉先生生元至正己亥十月十有八日享年六十有四配林氏元玉融書院山長某之孫次李氏胡氏子男一即冷女二長適林昶次適林銑孫男一曰緒女二未卒前數日子與學士金公幼孜相繼往問之先生從容與語移時若無事者及屬纊之際神氣清明未嘗少亂非養

之有素其能然乎銘曰

氣和儀恭內淳且仁孝友博睦端已淑人善泐惠周學
充才瞻踐履持循始終無玷職訓於庠顯秩屢遷餘二
十年聲光煜然進侍講筵寵眷攸盛執經陳義贊輔以
正維德維善肇積於先顯榮遭際食報自天爰及後昆
繩繩繼繼衍慶流芳有永無替大溪之山玄室是藏銘
以昭之遺德孔彰

故奉訓大夫右春坊右諭德兼翰林侍讀林君

墓誌銘

宣德二年五月辛亥奉訓大夫右春坊右諭德兼翰林侍讀林君卒于官交游之士莫不為之傷慟臨終之夕其孤雲翰適自南京至幸獲一見不及有所言而絕良可哀也將奉柩歸葬於鄉某山之原乃匍匐涕泣以翰林修撰王君鈺所述行狀來乞銘予與君同鄉又同官而素相好弗可以辭按狀君諱誌字尚默晉黃門侍郎頴之後頴從晉元帝渡江居建康其子祿由散騎常侍

出為閩之晉安太守子孫因家焉是後有仕為宋御醫
院使諱古松者君之五世祖也曾祖諱清祖諱顥父諱
興皆隱德弗耀母游氏宋監察御史廣平公之後嘗夜
夢梁僧寶誌入室而生君因以名焉幼穎悟其母嘗口
授經傳即朗然成誦在髫鬢時已喜為文辭後從學於
王偁孟揚極好辯論因字之曰尚默將弱冠選入郡庠
益自勤勵於經史子集旁及天文地理星命醫卜之書
無不研究而尤工舉業性至孝父早世事母益謹母或

有疾則憂形於色親調湯藥不敢輒離左右及母歿家雖貧薄而殯殮葬祭一於禮而不苟永樂辛卯鄉試壬辰會試皆第一殿試賜進士第二人授翰林編修考滿陞修撰嘗纂修五經四書性理大全古今名臣奏議郡邑志書辨論精確勤於編述迥出儔輩甲辰秋九月陞侍讀尋陞右春坊右諭德仍兼舊職階奉訓大夫給二俸嘗兩為京闈考試官去取惟公士子敬服洪熙改元蒙恩賜誥得推恩追贈其父如君之職母為宜人每痛

二親不逮祿養語及必悽愴終日蓋君治家儉而有禮
待宗黨極厚族弟喜幼孤無依養於異姓取歸撫育迄
于成立勸子姪讀書言不輟口聞有領鄉薦者輒加慰
勉與鄉人周旋款洽不事矯飾鄉人亦多敬愛之事其
師孟揚最謹孟揚後為翰林檢討以事沒于京為之經
畫家事以反其妻子于閩處僚友必誠必信於人無所
毀譽在朝十有五年入則恭勤趨事惕然警勵雖隆冬
盛暑不自知其為勞退則靜坐一室優游疎散醉吟自

適淡然若與世事不相干者家居時郡庠後進多從之
游若今湖廣叅政黃澤浙江按察使林碩輩皆親及門
受業時多推其學問有源委以為吾閩之傑然者自號
鄮齋又號見一居士所著詩文雄健簡古多為人所傳
誦與修二聖實錄方擬告成歸省丘墓展焚黃之禮而
乃以是春疾作自知必不起遂請於朝得告而疾日加
劇第奄奄一息以待其子之至而卒其生洪武戊午八
月四日至是享年五十配陳氏有淑德封宜人子男二

人長即雲瀚次雲濯女三人長適黃淑敏次適程稔皆
宦族也其一尚幼嗚呼幼學壯行君子之志也惟君荷
聖朝教育之恩學既有成官兼顯職可謂榮且盛矣亦
可謂得行其所志矣烏可以無銘其辭曰

林氏之先閩閩以崇粵自建康始居閩中歷世相傳其
積彌厚發之於君獨稟其秀孝友篤至信誼卓然學有
源委思如湧泉爰擢巍科超出流輩拜官翰林詞益濤
霈編摩纂述克慎克勤侍讀講筵忠言是陳輔導春宮

多所裨益考藝京闈公論籍籍不盈以矜志節允堅無毀無譽罔不推賢善積厥躬惟君之德學淑諸人惟君之澤閩山蒼蒼閩水汪汪藏石於斯百世不忘

翰林修撰承德郎李德良墓誌銘

永樂乙巳某月某日翰林修撰李德良卒於官其孤輝奉柩將以某年某月某日葬於其鄉某山之原而以監察御史吳實狀來乞銘予忝同鄉且又同官素與之善誼弗可辭按狀德良其字姓李名馬閩之長樂人其先

有仕宋為提幹者至今鄉人稱提幹李家曾祖某祖某
父原善皆隱德弗仕德良少穎悟甫十歲輒能通孝經
論語悉其義既長學益進入補縣庠弟子員昕夕勤勵
弗懈肆筆為文出人意表前輩多讓之歲丁酉鄉薦戊
戌試南宮皆居前列三月朔旦殿試士凡二百五十人
上親閱其文擢為第一改其名曰騏越三日傳制唱名
凡三唱無敢應者上曰即李馬也騏乃受詔賜狀元及
第明日賜紗帽銀帶朝服拜翰林修撰中外相傳以為

榮德良為人嚴毅方正事父母極孝敬奉繼母尤謹與
人交和而有節直而能信非禮之言不出諸口人有不
善輒面言之無有所隱平居慊然若無所為及議所當
為者則勇於為之不倦親族有孤貧者必收撫之鄉黨
有窮匱者必賑恤之其與內廷纂修及在翰林考校恭
勤廉謹不怠於所事人無非之者癸卯秋承命典文衡
京闈去取進退一循至公士論歸之甲辰夏忽遭疾逾
時乃愈方愈值太皇帝升遐聞之驚悸哀怛即出哭

臨或勸其宜且慎疾則曰吾受主上厚恩不能他有所
裨益今龍顏天語不可復瞻聽矣如又不獲一出涕拜
几筵以罄臣子之情將抱恨無極豈暇恤吾身哉未幾
疾復作久而弗瘥雖未至殆劇然不能復事筆硯矣明
年己巳春正月蒙朝廷恩典頒賜勅命得以推恩賜其
父原善如德良之官贈嫡母葉氏為安人繼母黃氏及
妻陳氏皆封安人異病愈欲得所請以歸焚黃不數月
而繼母訃至扶疾奔喪抵家幾一月喪其配又越月德

良竟以疾卒享年四十有八配即陳氏有賢行子男一人即輝孫男若干人嗚呼若德良者可謂賢也已而位未及大顯年未及中壽夫婦相繼而歿誠可哀也誠可哀也烏可無銘以慰之銘曰

徂徠之松既材以構荆山之璞既琢而疾胡畀其才而齎其壽位雖不豐名則不朽鄉山之陽爵其深秀勒銘藏之以垂永久

國子司業張公墓誌銘

永樂丙戌秋七月三日國子司業張先生以疾卒於太
學之官舍京師士大夫與夫六館諸生皆相與哭之盡
哀既奉柩南還卜以某年某月某日葬其鄉某山之原
國子學正順昌黃立為述先生之行徵予銘之子生也
晚忝以科目入京師濫官翰林辱先生折輩行相契厚
今先生歿矣烏可無銘文以告後世遂弗獲辭按狀先
生諱智字玄畧姓張氏其先為延平之順昌人曾祖某
隱德弗耀祖某元贈滄州路平陽州判官父昇元以神

童薦補太學授秘書郎五轉而為江西儒學提舉母范氏周氏生母陸氏先生以元統乙亥某月某日生自幼有大志聰明穎悟讀書過目成誦羣兒為嬉戲之事必正色端謹如老成人稍長即能勵志於問學嘗慨然曰采玉必於崑山探珠必於滄海士之為學豈不出戶庭管窺蠡測所能至哉即日挾策入元都交當世之名士用薦補入國學元之季四方兵興先生以才出叅閩省機務省臣承制授先生同知新喻州事已而知事不可

為浩然退歸國朝初定天下先生即建陽之崇化里灑掃一室置古今書籍其中窮搜博覽沛然有得於心鄉黨爭企慕之洪武戊午以明經應薦上吏部授夷陵州學正凡九載以內艱歸既服除入覲太祖高皇帝方任賢圖治知先生才可用遂超拜禮部試左侍郎即首言宜以書籍頒布北方學校議者以費財不便先生正色曰使賢才彙征利益生民何惜此費衆大慙未幾實授右侍郎其在職能秉禮不遷綱紀秩然人莫不敬服之

居二歲以事左遷為國子學錄尋陞博士後遂擢司業
先生能誘掖獎勸以誨諸生故鮮弗底于造就其教人
一本於道德仁義之說孜孜焉開導後進老而弗衰一
時學者莫不師宗之永樂初今上幸學衆推先生講易
特蒙寵異賜予甚厚至是卒享年七十有二初娶魏氏
繼室某氏子男二人長時早夭次旼孫男若干人曰某
曰某榮於先生同里少時已聞先生名心竊仰慕暨官
京師得朝夕從先生杖屨之末以聆緒論私以為幸孰

謂先生奄然永逝而竟弗得以終惠教嗚呼可勝惜哉
然先生之文章事業不可以無述也謹撰為銘文一通
以納諸墓庶後之人有攷焉銘曰

猗嗟先生早馳駿聲蒐羅百家學需以盈元政不網才
弗大顯聖朝肇化齊志斯奮筮仕夷陵允為範模諸生
雲從濟濟文儒爰貳春官帝心簡在讜論嘉猷國史具
載晚教成均為學者師六館化之時雨是資書林之原
卜此窀穸過者式之先生之德

勅封左春坊左司直郎高公墓誌銘

洪熙元年十月乙未勅封左春坊左司直郎高公元昭以疾卒於家其子穀方遷翰林侍讀聞訃號踴慟絕既而屬中書舍人張益述公之行匍匐詣予拜且泣曰穀不幸先人奄棄生既弗獲侍湯藥沒又弗克躬飯含罪莫大焉願先生賜之銘以責諸幽庶少慰先人於地下而穀亦得以逭不孝之愆予弗獲辭按狀公諱焯元昭其字也世居揚之丁溪曾大父諱彬祖諱明父諱壽之

皆業儒弗仕兄弟四人長元吉次元暉次即公次元昕
公幼有節槩事親至孝而於兄弟尤相友愛甫冠遭元
季兵亂挈家避地吳中值艱險必以身先之而於飲食
衣服常推讓居後一家雍睦藹如也洪武初始歸興化
占籍於利名鄉歲癸丑長兄元吉出為廣東樂昌縣簿
又十有一年癸亥仲兄元暉為屯田主事先後皆卒於
官公不憚險遠皆負喪以歸葬焉弟元昕亦先卒公痛
念父母早亡兄弟相繼而沒歲時修祀必泫然流涕倍

加悲痛事二寡嫂恭謹如兄在時嫁孤姪女四人如已
出宗黨咸稱之嘗渡揚子江適有舟壞者乏貲以完即
探篋中金以濟之又嘗見刑屍暴露輒解衣覆之一市
人皆笑其迂公盛然而去父兄既沒家日荒落遂不得
已行賈以給衣食往來吳楚晉趙之間遇奇勝暨名賢
遺迹必登高弔古嘯歌觴詠意氣豁如也尤好問學長
於詩其所著有聽雨集自號義翁雅愛菊人或以菊軒
先生稱之配黃氏松江右族有淑德先卒子三長

闕

次即穀以進士歷翰林授中書舍人遷左春坊左司直
郎陞擢今官次稷女二人長適同邑成忠次適李衡公
以穀推恩受勅命得封今職其生元至正戊子某月某
日至是享年七十有八以其年某月某日葬西郭城堡
先塋之側嗚呼公誠篤善好義之士哉學足以淑身行
足以敦俗而又有子如穀者以承其家訓發身科目顯
榮當世是可尚也烏可無銘以貽後世銘曰

孝友篤至操履孔純德裕于躬義孚于人周游晉楚歷

覽四方晚節東籬一詠一觴生榮死哀振前啓後勒銘
藏幽永垂不朽

故處士江公墓誌銘

永樂十五年二月己巳予友監察御史江鍊聞其祖父
處士公之喪哭泣盡哀既而謁告予曰鍊不幸早失所
怙賴吾祖誨育之勤俾克成立茲又奄棄傷痛何可言
今將歸葬敢丐銘文以掩諸幽庶幾先德垂之不朽則
鍊之罪為少逭也予忝同里又托姻戚之好不容固辭

謹叙而為之銘處士諱子湑字伯載世居建安之瓊溪
曾祖諱安仁祖諱永寧父諱道生皆隱德不仕母黃氏
兄弟二人處士其次自其少時穎敏端重喜讀書事父
母處兄弟克盡孝敬比長恂恂謹飭待宗戚有恩接朋
友有禮見人有善則揚譽之有非義者則勸戒之饑寒
疾病賙給之惟恐弗及死無棺衾孤寡弗能自存貧乏
不能婚嫁者必具貲裝捐錢穀以資助之至爭鬭辨論
者片言折之無敢弗服鄉鄰多蒙其惠而未嘗有德色

尤好道家法雨暘疾病有所祈輒響應元季兵戈之後
家日衰落乃躬率子弟力稼穡貲遂饒裕嘗於舊居西
偏創樓以居其傍別築室聚書延聘師儒訓誨諸孫及
鄉鄰子弟遣其孫錢入郡庠以明經中甲申進士從孫
濟領鄉薦皆處士之教也予幼時常侍諸父得拜處士
於璜溪之上覩其風度聆其論議心竊慕焉其後既仕
而歸省屢得從處士杖屨謂榮今日克有爵祿以享其
貴富者皆先世積德之故又歷道前代忠臣義士流芳

後世者以相勉勵凡寺觀橋梁有頽圯者必捐已貲完治之雖巨費不復計暮年尤好安逸又於所居東南石鼓山下築廬一區固以垣墉傍植竹木花果日徜徉其中自號清隱叟歲時伏臘召諸孫羅列于前稱觴嬉戲以為樂人咸羨之永樂丙申冬十一月朔旦忽命具湯沐更衣告子孫曰吾今往矣汝輩宜益加修飭毋辱吾宗處士生於故元元統甲戌至是享年八十有四娶李氏有賢德子二長淵先處士十二年卒次源女二李子

真連福其婿也孫男八曰鏐曰鏗曰鎮曰鏐曰鉉曰鉉
曰銘曰某孫女五人曾孫男幾人曾孫女幾人將以某
年某月某日葬於石鼓山之原銘曰

閩有耆舊行服鄉閭守正慕道神人感孚壽富康寧惟
德之符善積于家慶澤實敷生弗獲施其命也夫歿而
流芳其理然歟石鼓之陽山迴水紆勒銘幽宮承世弗
渝

陳處士墓誌銘

永樂丙申冬十月翰林檢討陳君用扈從自北還即聞其父處士公之喪頓哭幾絕既而謁告于天官匍匐將歸皇上特命其襄事輒來不令終制用將行乃以編修黃暘所述行狀泣告於予請銘予於用有僚友之誼不獲辭謹序次而銘之按狀處士諱觀字宗仁姓陳氏其先光州固始人五代時遷閩中因家莆之水南遠祖諱某復析居郡右之龍門至諱某者即公之高祖也曾祖諱起考宗末以明經領薦時稱貢元祖諱湄父諱大同皆

潛德弗耀大同二子處士居次幼穎敏不妄言笑長而敦厚能甘清苦澹泊不為紈綺膏粱之習事父母盡孝晨昏定省左右奉養惟恐不得其歡心母氏早亡處士哀毀致疾遇歲時祭祀輒號泣終日人不忍聞父亦哀其志為之終身不復娶父沒事兄益謹出入起居必偕事不咨稟弗敢自專飲食衣服未嘗敢先焉待姻戚甚厚處鄰里有恩僮僕有疾必命醫市藥躬視扶持之惟恐失所與人交誠實無偽鄉鄰有為不善者卒皆化之

當元季時家用匱乏人所弗堪處士處之泰然不以為意嘗曰富貧命耳吾豈累於此耶惟供祭祀待賓客則豐腆而自奉甚薄年四十方有子稍長則教之讀書後入郡庠遂以明經登進士第處士聞之喜曰予家自貢元以下皆晦而不彰今吾子得列科目是能亢吾宗矣及授官處士益喜嘗以書戒之諄諄然惟以竭誠報國為言不及家事處士晚益康寧龐眉皓首神采煜然優遊里巷中咸稱為福人郡邑舉行鄉飲必推處士齒德

屢為正賓邑里有爭鬪不能平者唯聽處士一言決之
罔不信服藩憲欲求民瘼及有司賢否必咨於處士以
其存心公而無所阿徇故也以今年七月十二日卒於
家距其生元至元丙子六月十六日享年八十有一初
娶林氏繼徐氏俱有賢行先卒子男一人曰用徐氏出
也女二人長適翰林檢討黃壽次適新安士族王鳳孫
男二曰肅曰雍孫女一人將以明年某月某日奉柩葬
于某里某山之原嗚呼天道常與善人若處士之為善

而福壽兼脩俯仰無愧可謂至矣烏可無銘以告後世
銘曰

閩有陳氏固始來遷世本淳篤厥嗣永延處士紹之和
易溫淑生質之良如金如玉孝行於家信孚其鄉存弗
獲施歿而有芳莆山崔嵬莆水浼浼勒銘于斯爰示千
載

處士姚用恕墓誌銘

福之懷安處士姚用恕生洪武庚戌十二月壬戌卒宣

德五年八月戊寅其子刑科給事中銑聞訃將歸奉柩與處士之配葉氏合葬於仙宗鄉飛來山之原以予同出閩郡乃匍匐涕泣來請銘予弗獲辭按狀處士諱忠用恕其字也其先自光州固始徙閩因家懷安遂為懷安人八世祖諱子材仕宋為國子祭酒其昆仲五人相繼登第家聲大振至高祖萬曾祖珣祖觀父鸞世以德善稱皆隱弗仕處士年甫冠而失怙賴母陳氏訓育之比長好學師事國子博士志仁林先生朝夕講誦專以

明理篤行為務不事藻飾久之深得聖賢之旨士大夫咸稱重之其為人節儉恬淡雅好山水不樂仕進洪武乙亥郡邑有薦其才於藩省者心不樂焉卒竟罷去乃於榕城東百餘里構屋數椽旁植松竹又於旁近治田百畝種雜果百餘株遨遊其間嘗曰以此終吾身足矣夫復何求自號耕雲山人每念父早喪言及輒流涕事母敬謹得一異味母或未嘗不敢先食歲時伏臘及值先世諱日必竭誠奉祀不惟牲醴豐潔而傷感之情益

至篤愛二弟怡怡和睦始終無間言其為孝友類如此而又克自修飭聞一善言見一善行不啻若已出聞一惡言見一惡行若將浼焉撫育甥姪輩如已子族之貧窶不能自存者推衣及食與之男女長而不能嫁娶者具資裝以遣之間出行遇有持券號泣者問之則曰母死無棺立此券以為質即以白金贈之而焚其券其樂善好義又如此尤諄諄以教其子既而銑果克承處士之志登永樂辛丑進士第擢授今職將受勅命推恩錫

封而遽興風水之歎可勝惜哉處士初娶葉氏有婦德
能孝事其姑姑嘗曰吾自得新婦家事不勞而治葉氏
生洪武壬子七月壬申卒永樂乙酉正月癸亥得年三
十有四男一人即銑女二人適某某繼王氏亦克盡婦
道男二人錄登側室郭氏出也孫男幾孫女幾嗚呼處
士孝義昭彰自足以致不朽況於篤意教子以底于成
今居禁近克盡厥職異時不次之擢駸駸遠大而泉壤
之間抑豈不光耀乎是烏可以無銘銘曰

閩有姚姓來自固始子材肇興家聲崛起繩繩繼繼世以善稱爰至處士韞玉潛珍孝行于家德被于里感慕弗忘淪肌浹髓沂沅浚源浩其津津匪昌厥躬徯其後人

故資善大夫戶部尚書李公墓誌銘

宣德六年冬十月己亥戶部尚書李公以疾卒於京其子將奉柩歸葬于涇陽先塋之次乃奉中書舍人張恕所述行狀來請銘余與公同仕于朝交久而厚弗容辭

按狀公諱昶字文煜姓李氏世居隴西之涇陽曾大父諱榮大父諱通父諱成皆積德行善樂義好施為邑里所推重洪熙初以公貴得推恩贈其祖與父皆為正議大夫資治尹戶部右侍郎祖母韓氏母李氏繼母孫氏皆淑人公自少敦厚穎敏刻志問學事親孝事長敬處夫婦昆弟族黨姻戚之間恩義藹然及為邑庠生益自修飭為師友所稱洪武丙子由鄉薦入太學司成論秀擢左軍都事有能聲尋陞戶部郎中績用茂著永樂初

肇建北京增置行部而難其人天官以公薦聞特陞行部右侍郎北京當靖難之後民甚凋弊而行部初置政務糾紛公惟夙夜敬勤盡心協贊凡所施設各適其宜歲丁酉北京營建材用所需行部最為繁劇公則不遑寧處協心經畫事無廢缺壬寅春轉戶部贊佐彌至國之儲蓄民之貢輸以至賦稅之損增金帛之出納或四方之旱澇災傷年穀之所收豐歉公皆調度有方規畫有法及扈從北征董運糧餉道經數千里士馬足用而

無匱乏之虞公之力又居多焉宣德五年冬公以老成
為皇上眷念特降勅陞公為資善大夫戶部尚書賜以
寶帶且命專督收支京都及通州諸處倉糧方有條緒
而大故及之嗚呼惜哉公生元至正癸卯六月某日至
是享年六十有九訃聞上為之嗟悼親為文遣官以祭
命工部為治墳塋凡在朝公卿大夫皆相率弔奠莫不
流涕太息以為無復有斯人也配史氏有賢行封淑人
子男三長曰適次遵次適女二長適同里武景次適金

吾右衛指揮劉剛孫男四曰楸曰樞曰杲曰梓孫女六人曾孫女一人惟公慈祥愷悌謹畏小心居官任事克致成效已有差失聞人言即改弗吝人有愆過從容諭之不峻不迫雖奴隸有犯亦不施刑公退之暇獨拳拳督勵諸子讀書務實母事矜夸性不喜事生業所得俸祿及朝廷之恩賜者皆均施姻族不少留卒之日家無餘資故歷仕三十餘年人無怨惡之者若公之所為非所謂篤厚之君子也耶是宜有銘以昭遺德銘曰

猗歟李公忠厚仁恕發迹幕僚尋陟郎署貳卿之任贊
佐有方政不競綈民乃樂康營建都邑百需具舉公殫
厥心以慰當宁從征塞外遠陟遐荒饋餉有餘師武用
張迨進司徒出納是董條理經營益隆恩寵云胡遽棄
不究其功終惠自天以表公忠惟公之忠歷事四聖始
終弗渝秉心公正休命駢臻從古所稀生榮死哀夫復
何悲涇陽之原靈秀攸萃刻石埋幽用告後世

黔寧昭靖王夫人耿氏墓誌銘

宣德辛亥十一月壬戌朔黔寧昭靖王夫人卒訃聞上
為之感悼親製文遣中官諭祭命有司為治墳塋恩至
厚矣其子駙馬都尉昕將以明年某月某日奉葬乃述
夫人事行請予銘夫人姓耿氏世居鳳陽父再成僉都
督追封泗國公諡武莊母鮑氏贈泗國夫人夫人孝敬
慈惠出於天性及笄以德儀婉婉為黔寧昭靖王繼室
王姓沐諱英父母早亡幼蒙太祖高皇帝鞠育保愛恩
猶已出長而忠勇四征有功眷待益隆自僉大都督府

事累封西平侯卒贈黔寧王諡昭靖夫人亦屢承恩禮
兩受褒封貴而益恭富而能儉言非禮不發事非禮不
為閨門整肅勤於內助王甚敬重之時國家開創之初
王多效勞于外夫人綜理家政其奉先禮賓待姻族雍
容而有禮表率諸婦恤孤撫幼嚴謹而有恩以至處媵
妾馭婢僕周貧濟乏酬應往來皆寬恕而周浹人無小
大莫不翕然稱為賢夫人是以王無內顧之憂而得展
布忠力為朝廷所倚重既沒夫人訓迪諸子咸底成立

安享祿養壽八十有七王先夫人馮氏一子曰春襲侯爵而卒夫人子男四人曰晟嗣封積勲進爵黔國公加封太傅總戎鎮雲南將卒感其誠士民懷其德而蠻夷亦莫不帖服曰昂右軍都督同知掌雲南都司事規畫撫綏咸適其宜曰昶早卒曰昕駙馬都尉尚常寧公主太宗皇帝以昕肺腑之親屢任以事皆稱上意令譽有聞女四人亦賢淑長適指揮戴玉次適右府右都督追封定國公徐增壽次適營州衛指揮孫毅次適朔州衛

指揮周忠孫男九人儼僖俱俊某某某女八人長
壽昌王妃次趙王妃次適成國公朱勇次適右府右都
督陳政次許嫁武定侯郭珪餘在室曾孫男二長曰玘
次曰某女幾人於戲夫人作配元勲婦道母儀淑德懿
行脩於身著於家恩榮壽考享有全福是宜有銘以昭
不朽銘曰

猗歟夫人名閼毓秀惟淑惟賢益長益懋乃配雄傑感
會風雲樹勲明時為國將臣篤生賢子克紹前烈為侯

為公光輔邦國天錫之福彌久彌敦為國夫人壽逾八旬恩命存臨哀榮終始委祉遺休子孫世世爰卜佳宅京山之陽銘以藏之千載垂光

詹事府少詹事兼翰林院侍讀學士贈嘉議大夫禮部左侍郎曾公墓誌銘

宣德七年春正月辛巳詹事府少詹事兼翰林院侍讀學士曾公卒於北京之官舍予與少傅楊公往哭之士大夫皆往會哭翌日予二人以聞皇上悼歎即命禮部賜

祭贈嘉議大夫禮部左侍郎命工部治墳塋兵部給舟
歸其喪將行其季子种謁予拜且泣曰种父未卒前二
日屬春坊庶子周公狀其事行命种請墓銘於先生先
生幸賜之以慰先人於地下予聞而並悲念與公文好
三十年而今已矣奚可辭銘公諱榮字子啓吉之永豐
人其先世出自武城西漢末邨國十四代孫諱據者避
王莽之亂率族人南遷散居南豐廬陵諸郡至宋兵部
侍郎江西湖廣安撫使贈武城伯諱晞顏者公之高祖

也元翰林直學士諱德裕者公之伯祖也翰林編修知制誥諱巽申者公之祖也考諱叔本妣張氏公幼穎敏端重言笑不易五歲盡識象戲字七歲從學伯父兩皋十五以其所學訓族人子弟十七出教新淦胡氏塾已有名時儒者鄒仲熙鄒幼亨輩皆忘年與之交二十充邑庠生教諭戴正心文學老成尤重公既作詩勵之復為龍說期其大用永樂元年中江西鄉試明年禮部會試中選者四百七十人公在第八廷試遂中第一賜進

士及第太宗皇帝奇其才親批所對策褒美之賜冠帶
朝服授翰林修撰承務郎未幾詔選進士二十八人俾
進學文淵閣公為之首上嘗召問典故公奏對如響每
應制詩文皆立就由是深沐寵眷纂修永樂大典命為
副總裁授儒林郎五年陞侍講授承直郎丁內艱大駕
巡狩北京起復扈從同邑有坐姦黨事逮公者人以為
危太宗持原之謂曰朕惜爾才也公所居西長安門外
家人不戒火延及禁垣上亦以公故置不問嘗與諸才


俊賦天馬海青歌於上前公獨先成詞氣豪宕太宗深
加歎賞陞承德郎滿陞侍讀學士與修太祖高皇帝實
錄書成重沐賜賚丁父憂復起就職仁宗皇帝嗣位皇
上正位儲官陞右春坊大學士仍兼侍讀學士授奉議
大夫賜誥命贈其父為奉議大夫左春坊大學士兼翰
林侍讀學士母為宜人洪熙初元侍皇上監國南京宣
德改元與修兩朝實錄書成賜金織襲衣白金文綺進
詹事府少詹事賜寶帶日直文淵閣歲時屢拜御酒珍

饌白金鈔幣之賜恩意隆洽一日趨朝以欬嗽遽引退
上遙見之詔免朝叅公益敬慎弗懈踰年疾復作上亟
命醫往治公知不可起自為贊遺相知者訣別遂卒公
生洪武壬子八月戊戌享年六十有一既卒公侯六卿
以下皆往哭奠而士林君子咸共悼惜以為斯人不可
復得矣其配鍾氏有賢行封宜人子男三長柁先卒次
稷次种女五劉敦會鍾公鉉周秀夫胡顥勉高欽夫其
壻也公安貌魁偉襟度夷曠孝友忠實出乎天性而才

氣志行尤超卓不羣兩京鄉試禮部會試屢典文衡去
取率公平素獎勵後進以為已務宗婣鄉鄰有急難靡
不用情善飲酒與賓朋觴詠談笑傾倒意豁如也為文
章才思滂沛頃刻千百言不待思索工書而草書尤精
得晉人風致四方慕而求之者足相躡其門至於商確
古今講論政治無不切當其葬以某年某月某日其墓
在某山之原銘曰

偉哉曾公卓犖瑰奇少處鄉邑才已不羈永樂初科首

賜及第玉質金聲為國令器居官翰苑克慎克勤文行之懿遠近著聞歷事三朝竭心贊翌寵眷殊深屢進清職弗究厥施遽止於斯恩命之隆生榮死哀惟茲鄉邑山盤水遠銘諸其藏千古有耀



文敏集卷二十一

欽定四庫全書

集部

文敏集卷二十三

詳校官編修_臣裴謙

中書_臣劉源溥覆勘

總校官中書_臣朱鈐

校對官學正_臣常循

謄錄監生_臣舒免岐

欽定四庫全書

文敏集卷二十二

明 楊榮 撰

墓誌銘

封榮祿大夫少保戶部尚書兼武英殿大學士

黃公墓誌銘

宣德六年冬十一月丙寅封榮祿大夫少保戶部尚書兼武英殿大學士黃公卒於家禮部以聞上遣官諭祭詔有司治墳塋如制將以卒之明年某月某日葬于邑

之大羅山與其配夫人王氏合窆其子淮述行實請銘
予嘗與淮同官得拜公于南京親其丰儀聆其議論而
悉其德善銘奚可辭公諱性字思恭別號靜菴世為溫
之永嘉人宋時有諱衮者張九成榜進士官御史檢法
公八世祖也修職郎諱適道者公高祖也元衢州明正
書院山長諱南一其曾祖也松陽縣儒學教諭諱應發
其祖也父諱通以淮貴公之祖若父贈官皆與公同祖
妣劉妣屠配王皆贈夫人公生而秀偉少失怙鞠于祖

母克砥礪于學髫年賦新竹詩出語驚人師友大奇之
元季方國珍據溫置官屬人莫不趨附以苟求利祿公
獨晦迹不汙值歲凶貲產盡廢公自處儉約而於奉親
事先之禮益謹弗違國朝混一寰宇公之家業復振姍
族閭里貧乏者皆仰給於公內弟王時中少孤公綴于
籍中資遣為邑庠生升太學生督事山西馳書告公無
禦寒衣公嘉其能守即緘衣遺之閩人陳興祖客于溫
公善之死無以為斂公捐貲完其喪家有蔬圃里惡少

侵奪之公不與較或問之公曰妄人不可以理論也未
發惡少遭橫死鄉人以公為有容會時中得罪公家坐
同籍沒入公懇告所司求先世神主遺像及祖母劉傳
屬其壻珍藏之謂人曰吾家世積善性亦不敢為惡今
不宜有此及至京果得直而還先世制勅有遺失者皆
得於鄉人人謂黃氏積善之報初遣子淮補鄉校弟子
員至是復令入學卒業升太學登洪武丁丑進士授中
書舍人公至京師訓勵切至歸復賦詩勉以忠君奉職

永樂壬辰推恩封公奉政大夫右春坊大學士配為宜
人洪熙改元加封今職公善談論素不甚飲酒賓朋相
過必滿酌浩歌為樂喜法書名畫古器物尤好宋道學
諸儒詩嘗錄康節安樂窩吟置之座右時或憇息朗然
高誦作詩詞理兼至有靜庵集八卷暮年重聽屏人事
怡情泉石之間年逾九十鬚髮不盡白齒落更生步履
強健淮謝病歸或侍公遨遊林壑或駕扁舟往來別墅
衣冠偉然輝映後先近世未之有也公淳實持己以澹

素處尊貴以謙抑待人以寬厚鄉稱為長者疾既劇猶閱故舊贈遺詩文以自慰易簀之際手書遺言勗淮疾愈當趨朝圖報凡含斂葬祭必循古禮勿效世俗事浮屠勿藏器玩於壙書畢伸手足以示子孫瞑目而逝聞者莫不嗟悼焉公生元至元己卯四月癸未享年九十有三王夫人孝敬儉勤相夫有道訓子有法母儀婦德族里稱之壽八十有五先公九年卒永樂壬寅十一月十三日也子男二長濟庶出次即淮自中書舍人累官

至少保戶部尚書武英殿大學士為時名臣女一適王
士昌先卒孫男五樂早夭蔡棐采槃女三長適葉璣次
適王宜嘉次在室曾孫男四旭暉珣瑜孫女一尚幼銘
曰

猗歟黃氏永嘉令族世德之厚簪纓相續維公湜湜秀
穎不群卓有善行夙已著聞既謙以和惟孝而敬其心
休休於物無競中罹于難人為公危既直其枉公乃來
歸天報德善有偉令子早登科甲擢職禁侍勞效茂著

爵位益崇褒封之命再及于公惟公父子福祉天錫簪
綬光華聞望赫奕公今已矣公德未亡懿彼夫人同穴
而藏公與夫人儀行具美存歿恩榮垂耀無已大羅巖
巖靈秀所鍾子子孫孫世世其隆

太宜人曾氏墓誌銘

宣德七年正月丙寅詹事府少詹事兼翰林侍讀學士
王英之母太宜人曾氏以疾卒于家訃至京師朝之卿
大夫咸往弔詹事禮部尚書胡公以聞特命遣官賜祭

詔有司治墳塋命英乘傳奔喪英卜是年某月某日葬
其山之原乃以其姻家進士何自學所述太宜人行實
號泣請予銘太宜人諱隆曾氏世居江西之南豐後徙
盱江之楓坑又由楓坑徙金谿之黃通里遂占籍焉曾
大父諱文以學行著聞元至正間以崇文先生聘之不
起大父諱仍鵞湖書院山長父易洪武間為金谿縣學
教諭母鄭氏太宜人生而淑慧甫笄父為擇配得門弟
子王修本遂歸焉克孝舅姑敬事其夫族里以賢稱既

而舅姑與其夫相繼而沒太夫人年甫三十一男二女
皆幼男即英也太宜人躬治喪葬舉無違禮時家道貧
乏賦役繁重有勸其鬻書籍及田園者太宜人作色曰
此王氏世業以遺子孫安可自我棄之乃盡賣簪珥服
飾以資用甚至躬操井臼其孤拾薪以供炊爨雖極艱
苦而於奉先禮賓嫺族鄰里慶弔饋問之禮罔有遺缺
英少長即遣入邑庠為弟子旦夕戒其務學永樂癸未
英領鄉薦明年登進士第由翰林庶吉士擢修撰陞侍

講兩迎太宜人就養洪熙改元英以右春坊大學士兼翰林侍講學士得推恩封太宜人英謁告捧命書歸省抵家未久太宜人謂曰荷國厚恩當圖報稱勿以吾逗留也乃促之還朝宣德初英請以俸之半給於鄉邑以充養及受賜金帛每寓奉之太宜人皆弗自用悉以散之內外姻戚自英仕於朝太宜人持家三十年家益饒裕而布衣蔬食始終一節紡績織紵垂老不廢歲常以所製布寄英病革餘布尚多悉以給諸孫遂瞑目而逝

生元至正戊戌六月丁亥享年七十有五女長歸徐洪
次歸許鼎孫男五長曰裕宣德丁未進士廣西道監察
御史次曰祐曰考曰禎曰禔孫女一妙安曾孫男二述
暹女四惟太宜人出自儒門配于士族令德令儀脩于
身著于家康寧壽考重沐恩命是宜有銘銘曰

嗟哉王母天賦賢淑內助維嘉夙著雍睦中遭艱匱克
成厥家訓育其子茂著才華獲際聖明寵眷日盛恩及
慈闈光膺褒命壽福既崇顯榮始終我銘其德垂耀無

窮

洪徵士墓誌銘

三山洪徵士以宣德癸丑二月乙未卒于家其子吏部
主事英聞訃將歸卜以是年秋九月某甲奉徵士葬懷
安梅亭先塋之次與其配安人林氏合窆而以其外姪
孫監察御史嚴烜所具事狀詣予泣拜請銘予閱其狀
知徵士之為曠達君子也徵士諱真字子美先世來自
光州固始曾大父諱某元尤溪縣尹大父均王建陽縣

儒學教諭考均爵福州路儒學掾晚年退隱號竹軒世以文學行義為邑里所稱徵士生而聰敏性至孝年十一喪母號泣動人其父以配早喪棄妾媵出居北嶺左徵士獨隨養甫長值元季不振無心致用惟閉門讀書雖學無專師而書法道美作詩有理趣每感物興懷聊自賦以適意時邀賓朋飲酒唱和以琴書為樂不問家之有無壯年尤宏放不羈見人之善則獎諭之若自己出聞人之惡則麾斥之若浼諸身親鄰事有不直者夜

不安寢聞雞馳赴必別白是非而後已國朝統一寰宇
思欲試用以展其所蘊而動輒不利退而嘆曰是有命
焉不可幸致自是引晦若將終身暇則課諸子讀書尤
愛其姪順秀慧每語其兄曰此子必亢吾宗後順登進
士第八翰林讀中秘書與學士曾公子榮號二十八宿
擢刑部主事陞山東按察僉事已而徵士被薦於有司
懇以曠眊辭不就人或勸之公曰吾老矣此事當付之
諸郎遂遣子英入邑庠受經數戒家人勿以他事撓之

曰非靜無以成學也後英以禮經領鄉薦會試禮部第一既取進士擢禮部主事調吏部每歲郡行鄉飲酒禮必以大賓處徵士太守不躬詣請則不行鄉人無賢愚少長莫不愛重之年逾八旬鬚髮皓白猶康健日杖屨往復嫻族家優遊以樂今年春忽遘疾不起聞者咸悼惜之公生元至正丙戌八月甲子享年八十有八配即林氏靜重淑慧諳書史克勤教子先徵士十年卒子男四興垣寧英女四人馬顯余謚何興陳鼎其壻也孫男

五瑋瑩瑠琤瑤女四人嗚呼徵士抱負才器既不得用于時然能成其子俾有祿位褒封之命將及之而遽已焉良可悲也是用序述其大槩而為之銘銘曰

德善振振孝友肫肫才足有為志弗克伸嗟哉若人韞玉潛珍銘以昭之千古不湮

姜寺丞墓誌銘

宣德七年九月丁丑北京行大僕寺丞姜謨嘉謀以疾卒于官其妻子既如禮殯斂乃遣人報訃于家嘉謀之

父廷振公聞之大哭頓足而嘆曰天何奪吾兒耶亟具裝來北京挈其柩歸卜以明年癸丑某月某日祔葬于邑之赤松鄉袁村坂先塋之次乃以禮部郎中陳景茂所具事狀來請銘按狀姜氏世居金華白砂鄉之長山宋時有諱天與者為都巡使國子監簿自長山徙居城中桐齊坊有登寶祐丙辰進士諱子賢者嘉謀六世祖也高祖天瑞曾祖仁德元海北廣東道廉訪憲使大父公壽父銑即廷振俱隱德弗耀母陶氏陝西按察使溫

之姪女有賢行以洪武戊辰八月壬戌生嘉謀幼秀慧
向學年十三郡守方素易選為郡庠生僅五載應選來
京送文淵閣習書初至時予愛其聰俊時復召其隨行
詢及學問政事歷歷條對如響予固知其能也是後預
修永樂大典益慎益勤自總裁官而下亦莫不喜之書
成去歷政秋官法律一覽即通曉罪囚經問者罔有冤
初擢都察院都事轉廣東道監察御史授承事郎俱著
能聲既而扈從來北京聞母訃馳歸哀毀踰禮奉祖母

及其父孝敬始終弗替服闋調陝西道授文林郎以溢
員改湖廣武昌府推官讞議平允獄無淹滯而詞訟日
簡僚屬咸推重之藩臬並稱其有幹濟才乃委其督徵
各郡累年逋租所至鎮靜不擾而撫輯有方徵斂如法
不數月逋租悉完民之逃移者亦皆復業有因逋負鬻
子女者則出已帑贖歸其父母人咸德之尤惓惓作興
學校凡殿宇齋廡弊陋者捐其貲俸勸率守令修葺之
延接士大夫禮意周至與人交必敬必信且諳諸醫方

恒以藥物濟人有驗尤能賑恤貧乏憐憫困窮接人待
物藹然春風和氣無纖毫拂忤意由是人人愛之辛亥
冬秩滿考最陞今職夙夜躬勤趨事以圖報稱真得推
恩榮其親而遽止於斯嗚呼其命也夫配汪氏繼李氏
俱先卒復娶湯氏子男一曰某女一俱幼予悲廷振年
老失其愛子而又跋涉遠來挈其柩歸葬且攜諸孤詣
予泣拜請銘予何忍辭是用序述其大槩而為之銘銘
曰

猗歟姜氏娶之顯族世德相承益隆益篤爰及寺丞遭
遇聖明涉躡仕途茂著休聲方期弘遠胡乃遽棄親老
子幼孰不傷喟赤松之鄉先隴在焉祔葬勒銘千古其
傳

封翰林院編修文林郎謝以敬墓誌銘

宣德癸丑正月乙卯朔封翰林院編修文林郎謝以敬
卒于家鄉人咸相謂曰以敬用子璉貴得受封與其配
陳氏孺人光榮且美宜享壽祿而遽以疾終可勝惜哉

茲璉聞計將歸卜以某年某月某甲奉柩葬于郡之圓
峯先塋之次匍匐涕泣奉狀來請銘予弗獲辭按狀以
敬諱得原其先河南光州固始人曾祖大有隱而弗仕
祖雲從博通經史為泉州路儒學正凡其弟子經指授
者皆克有成所著三場策要百餘篇行於世父立中抱
負才器遭時多艱乃自泉徙漳之龍溪今為龍溪人母
余氏淑慎柔嘉克勤內助以敬幼穎敏有志於學篤孝
其親甫冠父歿而事母尤謹常依依不忍離左右侍起

居奉甘旨咸得其歡心母嘗有疾躬侍湯藥日夜不脫巾帶母歿哀毀成疾歲時祀先母於正寢而病其隘乃創家廟于居室之東既成告奠儼若祖宗之來格於是神安心安人咸羨之其為孝類若此為人襟度灑落不吝施予事所當為者莫不竭盡心力處邑里之間惇於信義不妄與人交交則必誠與少長親疎貴賤之相接莫不各當於禮有犯不校見人之善則獎勵之有惡則勸戒之人人悅服故人之子有逋負官錢者輒以所乘

馬與償不論其直人有坐事繫獄者其妻攜金泣拜求
解以敬拒之曰吾惟義是視金奚用哉乃密為規畫事
竟得白其為義又如此尤篤於教子每聞書聲則喜而
自得時課諸子至夜分不厭不倦晚年好靜別構一室
以居自號曰聚翁生元至正丙申某月某甲至是享年
七十有八子男四人長安貞次添養早卒次鼎季即璉
以進士及第為翰林編修以敬所由受封者也女二適
周聰學鄭陽初皆士族孫男三進祖進宗進觀嗚呼以

敬克持其身享有高年榮受封秩其福可謂脩矣是可
銘也銘曰

謝氏之先來自固始由泉徙漳世濟厥美以敬承之孝
義是崇乃生令子以臻顯融褒命自天享此蕃祉壽雖
有終名則奚已圓峯之陽先塋在茲爰祔于斯潛德永
垂

封太安人樓母胡氏墓誌銘

浙東世稱文獻之邦所居多名家大族若金華義烏樓

氏其一也簪纓文獻之澤奕葉相承代有顯人今太安人胡氏亦名族也乃配于樓氏之子孫曰子惠者焉太安人諱住字安真大父季良仕元授官將仕郎父世舍母張氏太安人生而淑慧幼從姆教讀孝經列女傳諸書悉領要義嘗語人曰此人道之當然女婦之所當習者也聞者莫不歎服稍長擇壻遂配于子惠既入門相夫有禮事舅姑盡孝奉宗祖盡誠處妯娌待姻族以和以敬禮賓恤下莫不各協其宜家雖饒裕而自處儉約

每聞人貧困及有喪不能舉孤貧無所依者必語之於夫以財周給之惟恐不及夫沒持身益嚴謹理家有條序子婦是則是效罔敢少違内外交贊其賢尤諄諄然篤勵諸子讀書以文昌性穎悟令入邑庠受經既而領永樂丁酉鄉薦卒業于太學擢冬官主事洪熙改元得推恩於親贈子惠如文昌之秩太安人始受封焉宣德五年得請歸省太安人一見喜動顏色謂之曰汝父臨終以汝屬我今克成立庶無負汝父之志矣未數月遣

其還朝曰事君當敬謹厥職夙夜無懈勿以吾老眷戀
則忠孝可兩盡矣文昌既還以秩滿陞屯田員外郎未
閱月以薦陞郎中冀得誥進封以為親榮而太安人遽
以疾卒實宣德八年六月丁亥也生元丁酉六月庚午
至是享年七十有七葬某鄉某山之原子男四人文潮
文思次則文昌又次曰文成女一適陳景善孫男十一
永壽永原永福永宗永衡永華永貴永堅永寧永泰永
安孫女二妙齡妙貞嗚呼婦德以孝敬勤儉相夫教子

為賢太安人盡無有之而竟以子貴膺受褒封優遊安榮享有壽考非賢德曷克致此是宜有銘以示來世銘

曰

女婦之行孝敬柔懿維太安人其德斯脩既享壽祉爰受褒封嗣續孔蕃世業益隆高山峩峩新阡鬱鬱鐫石刻辭永賁玄室

致仕訓導遯希遠墓誌銘

宣德癸丑冬十月某甲致仕訓導遯氏希遠卒于家初

希遠疾作其子翰林庶吉士端聞之切切懇告歸省而弗果既而聞訃呼天號地頓哭幾絕越旬日匍匐拜告予曰端不肖罪孽深重殃罹先人今將歸與兄善謀卜以某年某月某甲奉柩葬杭之西湖南山先塋之次惟先人之德恐久而湮泯乃囑吾父門人四川叅議沈升為述事行請銘於先生先生幸賜之銘雖死猶不死也予憐其意乃按狀序而銘之希遠諱宏號怡菴其先女直人族屬多仕金至六世祖諱某為金駙馬歿封魯王

生其不仕其生其仕元為河南行中書省左丞卒贈廣平郡公實希遠之曾祖也因家懷慶之修武左丞生子三長師顏元江浙行中書省左右司員外郎次魯曾永貞俱登元泰定天歷進士顯庸于時師顏生江浙行中書省都事元臣實希遠之父也家于杭之仁和遂為仁和人母某氏希遠幼失怙克勵志讀書奉母盡孝事兄尤謹國朝洪武初選為郡庠生從大章受書經既而上書論時政高廟召見命賦秋柳念其年幼俾歸卒業不

數載充貢太學親炙張美和錢宰諸先生益嗜學雖星
歷醫卜之書亦皆涉獵嘗奉命使河南湖廣山東諸處
所至有能聲歲庚申以母老懇告得歸侍養時二兄已
歿家甚貧有薦為湖郡訓導者力以母疾辭弗就惟居
鄉授徒以奉母母歿哀毀踰禮經營喪葬纖悉不苟歲
時祭祀哀泣動人自是無心仕進寄情于湖山之間以
自適焉庚辰當道者薦之授海寧縣學訓導教法甚嚴
諸生多造就陞蘇之吳江教諭先是吳江司教者縱弛

諸生弗克成效希遠至督勵如海寧時學者方遵其教而以秩滿上京師天官以舉人弗及員遷常之武進訓導武進學者聞其至皆喜得之已而致仕歸鄉閭居優游切於教子端登宣德庚戌進士第績學中秘將躋於大用凡其先後所教生徒至是亦彬彬輩出擢魏科升冑監膺顯仕者多有其人卒之日聞者莫不悼惜焉希遠生元至正癸巳十月某甲享年八十有一配吳氏淑慎儉勤子男二長曰善次即端女一慧蓮適監察御史

上海陳質孫男三希遠學問明正言動不妄喜賓客而
不濫交能容物而好惡不爽賦詩作文理趣無至尤長
於古選有怡菴藁村居吟紀行藁藏於家淑諸後進惇
本務實不求近效蓋淳謹忠厚之士也是宜有銘銘曰
孝友克敦博學有文振鐸庠校教道是尊厥德孔昭宜
衍而茂不大其榮式昌厥後

封刑部主事張添祐墓誌銘

宣德癸丑十一月甲辰封承德郎刑部主事松江張添

祐卒於家其子吏部稽勲員外郎鐸聞訃將歸以明年甲寅某月某甲葬其山先塋之右奉翰林修撰同郡陳詢汝同所述行實來請銘泣且告曰鐸承嚴訓竊祿於朝吾父幸蒙初命褒封矣而鐸今陞秩加祿列為大夫方期迎養冀得加封以躋顯榮而不能待抱痛曷窮先生幸哀而賜以銘庶幾先德居恩兩不泯也按狀添祐諱祐世居松江上海之烏溪曾大父德山大父仲文父汝弼皆晦迹務善母沈氏有淑行添祐生有至性舉動異

群兒長而務實好學甫知嚮導而失所怙弗克終業惟
日孜孜砥礪厥行急於為義始終弗替故貧困者賴以
賙濟危急者賴以扶持至於嫁娶愆期喪葬弗克舉者
莫不捐貲以助焉有惡少張勝安者為患鄉里奮然率
衆祛之其友潘文英為凶徒焚死即攜其孤珙白發擒
戮之仍撫珙長成而妻以孫女所居西近有橋曰太平
歲久頽圯將新之以便行者而術者云弗利則毅然曰
吾志在濟人設有不利請自當之術者大沮而橋竟成

鄉人尤服其公凡有鬭爭是非曲直不辨者得一言即止不復論故號曰張一句或勸之仕則曰吾固當効力但學識未充將有待於吾子也於是遣鐔入邑庠受業於黃成章既而以善書應召入太學擢工部主事調刑部俱著能聲洪熙紀元封添祐如鐔之職配繆氏太安人自是屏絕外累構軒溪側扁曰野趣與賓友賦詩飲酒為樂人莫不賢之一日疾作召其子與孫諭之曰吾平生敬慎不蹈非禮凡義所當為者罔不奮力今被光

榮非偶然也汝輩宜勉旃歸亦以吾言諭之言訖而
逝享年七十有二子男二長即鐸次曰紆女二淑清適
潘讓淑端在室孫男三曰淳曰泳曰沂女三曰妙賢即
珙妻妙婉妙婉皆幼嗚呼善為百行之首義為制行之
宜觀添祐之持身操行非所謂力善而行義者歟宜乎
有子顯揚而享其壽祿也不可無銘以昭其休銘曰
存沐恩光歿而有藏銘以旌之厥德彌彰

故詹州同知林文範墓誌銘

閩多故家而林氏之族為最盛今儋州同知林洪文範
世居莆之澄渚其一也系出唐賜紫金魚袋上柱國贈
睦州刺史披之裔披九子同時為九州刺史號九牧林
家後五世諱永者復遷城東前埭子孫因居焉至諱權
者文範之曾祖也良玉者其祖也德貴者其父也母周
氏昆仲五人文範居三幼穎敏務學弱冠選為郡庠生
事父母孝處兄弟敬歲丙子領鄉薦以外艱居制哀毀
踰節痛父不待養而事母益謹己卯將別母去京就試

屬妻鄭氏善事無違庚辰擢進士授湖廣辰溪邑令是
邑轄五溪諸洞獠獠雜處性俗頑獷難治文範躬勤撫
字訓迪有方其人漸化乃修文廟闢學宮選其俊秀讀
書習禮俾知為學之貴由是領鄉薦登胄監者歲不乏
人邑田雖廣而荒蕪者多歲計所收不足以充租額且
以郵傳役重有妨農務民多逃徙即條陳上訴詔允之
蠲租額四千餘石郵傳許借力於旁邑士庶愛戴逃徙
者皆復乃聚而相謂曰生我者父母活我訓我者林牧也

九載滿秩民不忍舍率耆老百餘人詣闕乞留弗允遂
懸其靴於邑之譙樓以寓其思永樂乙未陞滄州同知
時北京建都營繕方興郡邑各委賢能以司其事而文
範實董磚埴之役潔已奉公施設得宜人皆樂於趨事
工不勞而集三載考績例應去職而總督其事者以其
能且得人心特奏留之又一年聞母訃號慟幾絕抵家
營葬畢率族人修治先世祠宇墳塋遇歲時節序及祖
妣忌辰奉祀愈謹感愴益增訓族姓子姪以禮待嫻黨

賓朋以誠宣德戊申服闋改儋州夙夜竭心贊佐撫字
一如辰溪時州治朽敝謀諸僚友撤而新之幾三載政
理民安邑有巨猾積歲漁獵以賂勢要文範欲除之而
未發先為其捏詞赴憲司誣搆其罪至京脩述其枉以
聞內臺察其寃即移檄械巨猾以直之因得寓其外姪
戶部主事王凱家遘疾踰月而卒實宣德甲寅四月十
七日也先是月十二日朝廷降勅恤刑法司錄文範情
節以進二十一日蒙恩例得復職而文範卒已五日矣

聞者莫不悼惜焉距生洪武己酉八月五日得年六十有六配即鄭氏南湖三先生之裔識書達禮奉舅姑處妯娌相夫訓子咸協于道且善理家文範仕外三十餘年而無內顧之憂者皆本於婦之賢也子男四長曰橙早卒次寶次甫今為郡庠生俱鄭出季曰完側室出女一適同郡致仕教諭顧在軒之長子某孫男八瓊琬瓊璟玠琨琰瑛孫女三卒之時惟側室鄭與寶在為殯殮如儀扶柩南歸卜以某年某月某日葬于邑之文賦里

石門紫帽山之原其族弟賜進士及第翰林編修文為
述行實偕寶來請銘予與文範同年登第相知最深弗
可以辭乃撫拾其大槩而為之銘銘曰

嗟哉林君孝友肫肫持家撫民既惠且仁始宰辰溪興
學勸稼減租貸力蠻民順化繼陞華秩佐於滄州董工
輸作厥事孔修儋耳之政益務豈弟巨猾騁奸幾被誣
毀既直其枉仰荷聖明雖云歿矣足慰九京惟古循良
魯恭卓茂化行澤流名昭不朽君寶希之德富才優鐫

石刻銘永世垂休

杏隱居士彭叔敏墓誌銘

宣德八年十月戊寅杏隱居士卒於家其子建寧儒學教授勛聞訃奔歸將以某年某月某甲遵治命葬於居後之小金岡戌山辰向專遣人奉居士行實來請銘予家建寧素知勛之學行其淵源本於父祖也居士卒惜不能往哭以慰勛之哀銘奚可辭按狀居士姓彭字叔敏杏隱其號也先世有諱玕者唐天祐間吉州刺史又

有諱思永者為宋御史中丞名最顯世居廬陵山口至居士高祖少英曾祖子淳俱從信國文公起兵勤王寓永豐新陂繼遷龍潭之西遂居焉今為永豐令族祖貴德以書經鳴世號雪崖先生父諱景忠丁元季避兵移徙于外而貲產罄竭乃學醫以資其身居士既長克承父業而醫術益精凡邑里間有疾得其療而愈者不責其報人或以衣食與之則持歸以獻其父母父歿奉母尤謹母抱療疾十餘年所用藥餌及所思珍饌必竭力

供辦衣服澣濯坐卧扶持必躬為之始終弗替母疾危殆或云療疾歿後能染人必焚之可絕其患居士泣曰吾身即父母之身父母有大故雖殞身莫贖可付于烈焰之中乎寧以疾傳吾雖死無憾聞者莫不歎服而居士竟無恙母歿之日哀毀動人遇節序及祖考妣忌辰必齋沐致奠悲感不勝撫其弟文敏從弟時敏及兄仲敏之孤恩愛篤至訓育婚娶費由已出無所吝惜嘗重以金幣招延儒者曾子厚曾以南教其二子由是皆力

學勛登永樂乙未進士擢南雄教授九載滿秩改建寧
昂領宣德丙午鄉薦授四川大邑教諭皆能以學行淑
人聲譽甚著於是居士得以優游祿養老而彌健也生
平溫雅忠謹動止有恒言不妄發人不妄交處宗黨驩
然有恩秩然有禮間有拂其性者亦怡怡然未嘗少有
觸忤性頗嗜酒非節序親朋過從未嘗少醉人皆稱其
長厚生元至正己亥三月丙午享年七十有五卒之日
無少長賢愚咸悼惜之配同邑井源黃氏有賢行子男

二即昂昂也女一適同鄉劉伯端孫男四鉉鐸釗銳孫
女六長適富平王成名次適馮協祥餘在室曾孫男一
曰珙嗚呼居士之處心制行自少至老始終弗渝身雖
弗顯乃能教成二子久膺祿養壽考令終非有盛德曷
克至此是不可無銘也銘曰

猗嗟居士簪纓之胄業儒通醫惠澤孔茂孝行聿彰神
明是祐湜湜二子士林之秀享其安榮臻此遐壽卒藏
于斯尚弘厥後

故翰林檢討致仕陳君墓誌銘

吾友陳君嗣初諱繼號怡菴先世吳興長城人諱鄴者
自蜀徙南康之都昌七世祖篆宋明州通判徙星子五
世咸淳鄉貢進士洽其高祖也元翰林待制仝其曾祖
也祖諱徵號天倪受學臨川吳文正公得旨歸人稱天
倪先生至正間徙吳城父汝言國初濟南經歷有政績
母吳氏廬江名族永樂初以貞節旌表汝言初未有子
吳夜夢白衣神人授之兒遂產嗣初實洪武庚戌十一

月丙戌也明年八月父卒母抱歸吳城躬紡績以訓育之嗣初既長奮志於學受詩於鄉先生鄺尚德秦師尹受易于俞立菴既而忉忉然若不足復從半軒王止仲用是學日益博時家貧甚嗣初躬事農圃以供祭養親時或讀書或援琴高歌因以耕樂自號及筋力少衰乃開門授徒學者謂其善教多從之人尤以其為文簡健有法度求者相屬由是道益尊名益重郡邑交章薦之屢以目青母老辭不就母卒喪葬盡禮有聞於人仁宗

皇帝即位少傅廬陵楊公首以文學薦初授國子博士
尋改翰林五經博士命同太常卿南郡楊公直弘文閣
脩顧問時以為得人皇上嗣位命修先朝實錄書成荷
白金文綺之賜陞翰林檢討逾年以老疾乞歸明年疾
作既亟命其季子完誦西銘至存吾順事沒吾寧也因
接誦不已門人劉溥請問先生如何直答曰無事遂卒
實宣德九年五月六日也享年六十有五宗黨姻友門
生畢至哭之皆盡哀守令而下咸往弔哭朝之縉紳大

夫士聞之莫不悼惜配金氏故郡守綱之季女初受聘
綱之長壻坐法併沒官嗣初訴於朝乃得釋金素有禮
教亦甘清苦事姑以孝謹聞先十二年卒子男五宗寬
宏宣先卒季即完女二長適謝壙次幼孫男七傳儀仁
偉佃估傭女四卜是年九月十日葬吳縣太平鄉薦福
山先塋之次所著文集四十卷藏於家其賦性純淑聰
敏過人孝友篤至恒以不及事父為恨言及未嘗不流
涕奉母甚謹尤善養志長姊失所天養之終身訓育其

予甚至少姊早寡存恤其家曲盡恩意友人死無以為
葬買棺葬之他凡婚喪貧困與夫鰥寡孤嫠之弗克振
者輒賑恤之無少吝其為行大率類此完奉治命走京
師謂予有疇昔之好徵銘諸墓予按其門人大理評事
張益述為之銘曰

繫陳之先吳興孔昌既徙于蜀復居南康瞻彼吳會具
區之渙爰及中葉居用載卜光前振後詩禮簪纓蔚乎
孫枝繼繼繩繩有華其躬孝友斯著有豁其心問學斯

富既塞而通晚遭奇逢秩列弘文侍從九重日月清光
荐被寵遇于焉退休式慰衰暮歸視其庭子孫滿前云
胡不樂乃奪其年薦福之山先塋之側既藏既銘永昭
令德

故翰林檢討黃君墓誌銘

宣德甲寅六月壬戌翰林檢討掌國子博士事黃君肩
宗卒其子安將扶柩南歸以其年某月某日葬于邑里
某山之原乃奉狀偕其門生建陽主簿唐誠來請銘予

與脩宗出同年素相友善弗可辭脩宗諱某浙之嘉興
海鹽人世業儒曾祖某祖某俱隱德弗仕父文傑洪武
中為秦王府教授母顧氏脩宗生而秀偉幼克嚮學聰
敏出於天賦孝友本於自然伯父文俊為鳳陽淮遠丞
卒于官無嗣脩宗承父命為之後躬往迎其柩歸葬服
喪盡禮由是著名遂舉為郡庠生歲庚辰以易經登進
士第當得顯官固辭不就乃擢福建汀州府儒學教授
丁內艱服闋改河南之彰德能以其道訓諸生諸生學

成而仕者彬彬然嘗兩受聘校文闕西甄拔精審士論
歸之以績最陞北京國子博士講論有章課試有法得
其開益者莫不敬服秩滿陞今職益克盡心以求報稱
既歷三載例得授勅且封贈父母及妻恩命已行會肩
宗卒遂寢可勝惜哉其素性簡約罕與人接公退則閉
門靜坐無求無營不徇不阿凡為詩文下筆立就然不
求甚工取適意而已蓋類其為人焉生洪武辛亥三月
戊申得年六十有四初娶張繼費子男二長即安次正

嗚呼師儒之職古今所重惟肩宗克紹先業既不慕顯
榮而安於恬淡素位而行三十餘年清慎之操始終弗
替蓋其所得於已者既多而造就於人者亦不少焉是
宜有銘銘曰

偉哉斯人學行夙著恂恂其言煜煜其譽既登科第辭
尊就卑兩教名邦舉有良規闕右大藩文衡是寄去取
惟公式振士氣爰陞冑監為士子師講道談經斯文是
資榮陞翰苑仍典教事恩命將及夫何不俟維邕有山

體魄是棲銘以昭之潛德永垂

故翰林學士奉政大夫沈公墓誌銘

公諱度字民則姓沈氏也世居松江之華亭公以儒發身累官至翰林院學士階奉政大夫宣德甲寅冬十月乙丑卒于北京之第訃聞上遣官賜祭給舟車歸其喪詔有司營葬朝之公卿大夫士素相交者莫不悼歎弔祭之其孤藻奉柩東歸以其年某月某日葬于邑之玉屏山先塋之次乃狀公行實泣拜請予銘予與公為僚

友三十餘年相知最深誼弗容辭乃誌而銘之公大父
德輝號竹庭嘗為郡史平反冤獄鄉稱長者祖妣宗氏
儒家女父易元末為諮議叅軍棄官還鄉里授徒養親
人稱苦節先生妣顧氏出士族公賦性敦敏言動不苟
刻志讀書喜親筆札及長學問該博於書法尤精洪武
中郡邑以文學薦而以家艱坐稽緩謫戍南詔岷王聞
其賢延至藩邸接待甚厚時學士董公倫亦謫居南詔
一見公甚相敬愛董公歸朝首薦公召還未及登用伏

遇太宗皇帝入正大統詔求文學翰林編修今禮部尚書楊公弘濟首薦之擢翰林典籍與修太祖高皇帝實錄賜白金綵幣織金紗衣復承命書孝慈皇后傳及古今列女傳書法精妙式稱上意自是詔誥制勅及御撰詩文碑刻皆屬於公未幾陞檢討陞修撰復陞侍講學士上嘉其清勤賜二品袍服象笏命大官日給盛饌以寵異之官其子藻為中書舍人公與其弟翰林侍讀祭扈從往來兩京蒙被恩贈賚不可勝計仁宗皇帝登祚

賜誥推恩贈其父如公職母贈宜人公請告焚黃詔賜鈔幣給驛傳仍命藻侍其行鄉里榮之皇上嗣位陞今職年七十有三屢乞致事不允逾年特命食祿不煩以事公素有痰疾至秋輒作是秋益劇遂卒享年七十有八配鍾氏先二十二年歿贈宜人繼陳氏子男二長芹先歿娶高氏次即藻今陞大理寺副娶王氏孫男二潮有志于學早天源娶李氏孫女三曾孫男一曰寅生鳴呼公胸次坦夷持身儉約孝友忠勤出自天性居常以

不獲終養為憾言及必流涕歲時祀事惟謹粢嘗感疾
公晝夜守視調護甚至出入禁闥小心慎密始終一誠
嘗侍顧問得以從容進言多見采納至於講論古今薦
引士類無不精當所居構軒扁曰樂琴書處旦夕遊憩
其中以自樂為號人稱自樂先生所著詩文有滇南藁
隨筆錄西清餘暇自樂藁若干卷藏于家公之歿宜有
銘以昭于世銘曰

偉哉沈宗積世長厚維公紹承厥德益茂初起鄉邑乃

罹困窮用玉於成由塞而通遂登詞垣受知列聖恩賚
洊臨寶公之慶惟公之慶既壽而康子肖弟賢舉荷寵
光玉屏之山營茲宅兆銘以藏之千古有耀

文敏集卷二十二